

bandam transferemus; aut causæ et rationes affe-
rentur, quare, et quo consilio ita sit in lege, aut
in testamento scripum, ut sententia quoque, et
voluntate scriptoris, non ipsa solum scripturæ
causa confirmatum esse videatur; aut aliis quoque
constitutionibus factum coarguetur.

XLVII. Contra scriptum autem qui dicet, pri-
mum enim inducit locum, per quem æquitas causæ
demonstretur, aut ostendet, quo animo, quo con-
silio, qua de causa fecerit; et, quamecumque cau-
sam assumet, assumptionis partibus se defendet, de
quibus ante dictum est. Atque hoc in loco quum
diutius commoratus, sui facti rationem et æquitem
causæ exornaverit, tum ex his locis fere contra
adversarios dicet oportere causas accipi. Demos-
trabit, nullam esse legem, quæ aliquam rem iuti-
lem aut iniquam fieri velit; omnia supplicia, quæ
a legibus proficiscantur, culpa ac malitia vindica-
ndæ causa constituta esse; scriptorem ipsum, si
existat, factum hoc probaturum; et idem ipsum,
si ei talis res accidisset, facturum fuisse; et ea re
legis scriptorem certo ex ordine judices, certa atate
præditos constituisse, ut essent, non qui scriptum
suum recitarent, quod quivis puer facere posset,
sed qui cogitationem assequi possent, et voluntate
interpretari; deinde illum scriptorem, si scripta
sua stultis hominibus et barbaris judicibus com-

mitteret, omnia summa diligentia perscripturum
fuisse; nunc vero, quod intelligeret, quales viri ju-
dicaturi essent, idcirco eum, quæ perspicua vide-
ret esse, non adscripsisse: neque enim vos scripti
sui recitatores, sed voluntatis interpretes fore pu-
tavit. Postea querre ab adversariis, quid si hoc
fecisset? quid si hoc accidisset? eorum aliquid, in
quibus aut causa sit honestissima, aut necessitudo
certissima; tumne accusaretis? Atqui hoc lex nus-
quam exceptit. Non ergo omnia scriptis, sed quæ-
dam, quæ perspicua sint, tacitis exceptionibus
caveri. Deinde nullam rem neque legibus, neque
scriptura ulla, denique ne in sermone quidem quotidianio atque imperiis domesticis * recte posse ad-
ministrari, si unusquisque velit verba spectare, et
non ad voluntatem ejus, qui verba habuerit, acce-
dere.

XLVIII. Deinde ex utilitatis et honestatis parti-
bus ostendere, quam inutile, aut quam turpe sit
id, quod adversarii dicant fieri oportuisse, aut
oportere; et id, quod nos fecerimus, aut postule-
mus, quam utile, aut quam honestum sit. Deinde
leges nobis caras esse non propter litteras, quæ
tenues et obscuræ nota sint voluntatis, sed propter
earum rerum, quibus de scriptum est, utilitatem,

* Pro Cæcina, XVIII.

et eorum, qui scripserint, sapientiam et diligentiam. Postea, quid si lex, describere, ut ea videatur in sententiis, non in verbis consistere; et iudex is videatur legi obtemperare, qui sententiam ejus, non qui scripturam sequatur. Deinde, quam indignum sit, eodem affici supplicio eum, qui propter aliquod scelus et audaciam contra legem fecerit, et eum, qui honesta, aut necessaria de causa, non ab sententia, sed ab litteris legis recesserit: atque his, et hujusmodi rationibus, et accipi causam, et in hac lege accipi, et eam causam, quam ipse afferat, oportere accipi demonstrabit.

Et quemadmodum ei dicebamus, qui a scripto diceret, hoc fore utilissimum, si quid de æquitate ea, quæ cum adversario staret, derogasset: sic huic, qui contra scriptum dicet, plurimum proderit, ex ipsa scriptura aliquid ad suam causam convertere, aut ambigue aliquid scriptum ostendere; deinde ex illo ambiguo eam partem, quæ sibi proosit, defendere, aut verbi definitionem inducere, et illius verbi vim, quo urgeri videatur, ad suæ causæ commodum traducere, aut ex scripto non scriptum aliquid inducere per ratiocinationem, de qua post dicemus. Quacumque autem ire, quamvis leviter probabili, scripto ipso se defendenter, etiam quum æquitate causa abundabit, necessario multum proficiet, ideo quod, si id, quo

nitur adversariorum causa, subduxerit, omnem illam ejus vim et acrimoniam lenierit ac diluerit. Loci autem communes ¹ ceteri ex assumptis partibus in utramque partem convenient. Præterea ejus, qui a scripto dicet, leges ex se, non ex ejus, qui contra communiserit, utilitate spectari oportere, et legibus antiquius haberi nihil oportere. Contra scriptum, leges in consilio scriptoris, et utilitate communi, non in verbis consistere. Quam indignum sit, æquitatem litteris urgeri, quæ voluntate ejus, qui scripserit, defendatur.

XLIX. Ex contraria autem legibus controversia nascitur ², quum inter se duæ videntur leges, aut plures discrepare, hoc modo: Lex est, QUI TYRANNUM OCCIDERIT, OLYMPIONICARUM PRÆMIUM CAPITO, ET QUAM VOLET SIBI REM A MAGISTRATU DEPOSITO, ET MAGISTRATUS EI CONCEDITO. Et altera lex, TYRANNO OCCISO, QUINQUE EJUS PROXIMOS COGNATIONE, MAGISTRATUS NEGATO. — Alexandrum, « qui apud Phœeos in Thessalia tyrannidem occupat, uxor sua, cui Thebe nomen fuit, noctu, « quum simul cubaret, occidit. Haec filium suum, « quem ex tyranno habebat, sibi ² in præmi loco depositi. Sunt, qui ex lege puerum occidi dicant

¹ Certi. ² Abest in.

^{*} Ad Herenn. II, 10.

* oportere. Res in judicio est. » In hoc genere utramque in partem iidem loci, atque eadem precepta convenient, ideo quod uterque suam legem confirmare, contrariam infirmare debebit. Primum igitur leges oportet contendere, considerando, utra lex ad majores, hoc est, ad utiliores, ad honestiores ac magis necessarias res pertineat: ex quo conficitur, ut si leges duas, aut si plures, aut, quotquot erunt, conservari non possint, quia discrepant inter se; ea maxime conservanda putetur, qua ad maximas res pertinere videatur. Deinde utra lex posterius lata sit: nam postrema quæque gravissima est. Deinde utra lex jubeat aliquid, utra permittat: nam id, quod imperatur, necessarium; illud, quod permititur, voluntarium est. Deinde in utra lege, si non obtemperatum sit, pena afficiatur, aut in utra major pena statuatur: nam maxime conservanda est ea, quæ diligentissime sancta est. Deinde utra lex jubeat, utra vetet: nam sepe ea, quæ vetat, quasi exceptione quadam corrigere videtur illam, quæ jubet. Deinde utra lex de genere omni; utra de parte quadam, utra communiter in plures; utra in aliquam certam rem scripta videatur: nam quæ in partem aliquam, et quæ in certam quandam rem scripta est, promptius ad causam accedere videtur, et ad judicium magis pertinere. Deinde, exlege utrum statim fieri necesse

sit; utrum habeat aliquam moram et sustentationem: nam id, quod statim faciendum sit, perfici prius oportet. Deinde operam dare, ut sua lex ipso scripto videatur nisi: contraria autem aut per ambiguum, aut per ratiocinationem, aut per definitionem induci; quo sanctius et firmius id videatur esse, quod apertius scriptum sit. Deinde sua legis ad scriptum, ipsam sententiam quoque adjungere, contrariam legem item ad aliam sententiam traducere, ut, si fieri poterit, ne discrepare quidem videantur inter se: postremo facere, si causa dabit facultatem, ut nostra ratione utraque lex conservari videatur, ¹ adversariorum ratione, altera sit necessario negligenda. Locos autem communes, et quos ipsa causa det, videre oportebit, et ex utilitatibus et honestatis amplissimis partibus sumere, demonstrantem per amplificationem, ad utram potius legem accedere oporteat.

L. Ex ratiocinatione nascitur controversia, quum ex eo, quod uspiam est, ad id, quod nusquam scriptum est, pervenitur, hoc pacto: Lex est: SI FURIOSUS ESCIT, ² AGNATORUM GENTILIJUMQUE IN EO PECUNIAQUE EJUS POTESTAS ESTO. Et lex: PATERFAMILIAS UTI SUPER FAMILIA PECUNIAQUE SUA ³ LEGASSIT, ITA JUS ESTO. Et lex: SI PATERFAMILIAS IN-

¹ Et adversariorum. ² Agnatum. ³ Legaverit.

TESTATO MORITUR, FAMILIA PECUNIAQUE EJUS ¹AGNA-TORUM GENTILIUMQUE ESTO. Quidam judicatus est parentem occidisse. Ei statim, quod effugiendi potestas non fuit, ligneara soleæ in pedes inductæ sunt; os autem obvolutum est folliculo et præligatum; deinde est in carcere deduc-tus, ut ubi esset tantisper, dum culeus, in quem conjectus in profluentem deferretur, comparare-tur. Intercea quidam ejus familiares in carcere tabulas afferunt, et testes adducunt; heredes, quos ipse jubet, scribunt; tabulae obsignantur. De illo post supplicium sumitur. Inter eos, qui heredes in tabulis scripti sunt, et inter agnatos, de hereditate controversia est. Hic certa lex, quæ testamenti faciendi iis, qui in eo loco sint, adimat potestatem, nulla profertur. Ex ceteris le-gibus, et quæ hunc ipsum supplicio hujusmodi afficiunt, et quæ ad testamenti faciendi potestatem pertinent, per ratiocinationem veniendum est ad ejusmodi rationem, ut quæratur, habueritne testamen-ti faciendi potestatem.

Locos autem communes hoc in genere argumen-tandi, hos, et hujusmodi quosdam esse arbitramur: primum, ejus scripti, quod proferas, laudationem et confirmationem; deinde ejus rei, qua de quæra-

¹ Agnatum.

tur, cum eo, de quo constat, collationem ejusmo-di, ut id, de quo quæritur, rei, de qua constet, simile esse videatur; postea admirationem [per contentionem], qui fieri possit, ut, qui hoc æquum esse concedat, illud neget, quod aut æquius, aut eodem sit in genere; deinde idcirco hac de re nihil esse scriptum, quod, quum de illa esset scriptum, de hac re is, qui scribebat nemini dubitatur arbitratus sit; postea multis in legibus multa esse præterita, qua idcirco præterita nemo arbitretur, quod ex ceteris, de quibus scriptum sit, intelligi possint: deinde æquitas rei demonstranda est, ut in judiciali absoluta.

Contra autem qui dicet, similitudinem infirmare debet: quod faciet, si demonstrabit, illud, quod conferatur, ab eo, cui conferatur, diversum esse genere, natura, vi, magnitudine, tempore, loco, persona, opinione; si, quo in numero illud, quod per similitudinem afferatur, et quo in loco illud, cuius causa afferatur, haberi conveniat, ostendetur; deinde, quid res cum re differat, demonstrabitur, ut non idem videatur de utraque existimari oportere. Ac, si ipse quoque poterit ratiocinationibus uti, iisdem ratiocinationibus, quibus ante dictum est, utetur: si non poterit, negabit oportere quidquam, nisi quod scriptum sit, considerare; periclitari omnia jura, si similitudines accipiuntur; nihil

esse pæne, quod non alteri simile esse videatur; multis dissimilibus rebus, in unamquamque rem tamen singulas esse leges; omnia posse inter se vel similia vel dissimilia demonstrari. Loci communes a ratiocinatione, oportere conjectura ex eo, quod scriptum sit, ad id, quod non scriptum sit, pervenire; et neminem posse omnes res per scripturam amplecti, sed eum commodissime scribere, qui curet, ut quādam ex quibusdam intelligantur: contra ratiocinationem, hujuscemodi, conjecturam divinationem esse, et stulti scriptoris esse, non posse omnibus de rebus cavere, quibus velit.

LI. Definitio est, quum in scripto verbum ali-
quod est positum, cuius de vi queritur, hoc modo: Lex, QUI IN ADVERSA TEMPESTATE NAVIM RE-
LIQUERINT, OMNIA AMITTUNT; EORUM NAVIS ET
ONERA SUNTO, QUI IN NAVI REMANSERINT. « Duo
« quidam, quum jam in alto navigarent, ¹ et quum
« eorum alterius navis, alterius onus esset, nau-
fragum quendam natantem, et manus ad se
« tendentem animadverterunt; misericordia com-
« moti, navim ad eum applicaverunt; hominem
« ad se sustulerunt. Postea aliquanto, ipsos quo-
« que tempestas vehementius jactare cœpit, usque
« adeo, ut dominus navis, quum idem gubernator

¹ Abest quum.

« esset, in scapham configeret, et inde funiculo,
« qui a puppi religatus scapham annexam trahe-
« bat, navim, quoad posset, moderaretur; ille
« autem, cuius merces erant, in gladium ² ibidem
« incumberet. Hic ille naufragus ad gubernaculum
« accessit, et navi, quoad potuit, est opitulatus.
« Sedatis autem fluctibus, et tempestate jam com-
« mutata, navis in portum ² pervehitur. Ille autem
« qui in gladium incubuerat, leviter saucius, fa-
« cile est ex vulnere recreatus. Navim cum onere
« horum trium suam quisque esse dicit. » Hic
omnes scripto ad causam accedunt, et ex nominis
vi nascitur controversia. Nam et relinquere na-
vem, et remanere in navi, denique navis ipsa
quid sit, definitionibus queritur. Isdem autem
ex locis omnibus, quibus definitiva constitutio,
tractabitur.

Nunc, expositis iis argumentationibus, quae in
judiciale causarum genus accommodantur, dein-
ceps in deliberativum genus et demonstrativum,
argumentandi locos et præcepta dabimus*, non
quo non in aliqua constitutione omnis semper
causa versetur; sed quia proprii ³ tamen harum
causarum quidam loci sunt, non a constitutione

¹ In navi ibidem. ² Provehitur. ³ Tantum,

* Ad Herenn. III, 1, sqq.

separati, sed ad fines horum generum acommo-dati.

Nam placet, in judiciali genere finem esse æqui-tatem, hoc est, partem quandam honestatis. In deliberativo autem Aristoteli placet utilitatem, nobis et honestatem, et utilitatem.¹ In demonstrati-vo, honestatem. Quare in hoc quoque genere causæ quedam argumentationes communiter ac similiiter tractabuntur: quedam separatis ad fi-nem, quo referri omnem² orationem oportet, adjungentur. Atque uniuscujusque constitutionis exemplum supponere non gravaremur, nisi illud videremus, quemadmodum res obscura dicendo fierent apertiores; sic res apertas, obscuriores fieri oratione. Nunc ad deliberationis præcepta pergamus.

LII. Rerum expetendarum tria genera sunt*: par autem numerus vitandarum ex contraria parte. Nam est quiddam, quod sua vi nos³ allicit ad sese, non emolumento captans aliquo, sed trahens sua dignitate: quod genus virtus, scientia, veritas est. Aliud autem non propter suam vim et natu-ram, sed propter fructum, atque utilitatem, pe-tendum: quod genus pecunia est. Est porro quid-

¹ In demonstrativo autem. ² Rationem. ³ Alliciat.

* Quintil. III, 6.

dam ex horum partibus junctum, quod et sua vi, et dignitate nos illectos ducit, et præ se quandam gerit utilitatem, quo magis expectatur, ut amicitia, bona existimatio. Atque ex his horum contraria facile, tacentibus nobis, intelligentur. Sed ut ex-peditius ratio tradatur, ea, qua posuimus, brevi nominabuntur. Nam in primo genere quæ sunt, honestia appellabuntur. Quæ autem in secundo, utilia. Haec autem tertia, quia partem honestatis continent, et quia major est vis honestatis,¹ juncta esse omnino ex duplice genere intelligentur; sed in meliorem partem vocabuli conferantur, et honesta nominentur. Ex his illud conficitur, ut appen-tendarum rerum partes sint, honestas et utilitas; vitandarum, turpitudo et inutilitas. His igitur duabus rebus duas res grandes sunt attributæ, ne-cessitudo et affectio: quarum altera ex vi, altera ex re et personis consideratur. De utraque post apertius perscribemus. Nunc honestatis rationes primum explicemus.

LIII. Quod aut totum, aut aliqua ex parte prop-ter se petiunt, honestum nominabimus. Quare quum ejus duas partes sint, quarum altera simplex, altera juncta sit, simplicem prius consideremus. Est igitur in eo genere omnes res una vi atque uno

¹ Vulg. junctæ res:

nomine amplexa virtus. Nam virtus est animi habitus naturae modo, rationi consentaneus. Quamobrem omniibus ejus partibus cognitis, tota vis erit simplicis honestatis considerata. Habet igitur partes quatuor *: prudentiam, justitiam, fortitudinem, temperantiam. Prudentia est rerum bonarum, et malorum, ¹ neutrarumque scientia. Partes ejus, memoria, intelligentia, providentia. Memoria est, per quam animus repetit illa, quæ fuerunt. Intelligentia est, per quam ea perspicit, quæ sunt. Providentia est, per quam futurum aliquid videtur ante quam factum sit. Justitia est habitus animi, communi utilitate conservata, suam cuique tribuens dignitatem. Ejus initium est ab natura profectum; deinde quædam in consuetudinem ex utilitatis ratione venerunt; postea res et ab natura profectas, et ab consuetudine probatas, legum metus et religio sanxit.

Natura jus est, quod non opinio genuit, sed quædam innata vis inseruit, ut religionem, pietatem, gratiam, vindicationem, observantiam, veritatem. Religio est, quæ superioris cuiusdam naturæ, quam divinam vocant, curam cærimoniamque affert: pietas, per quam sanguine conjunctis, patriæque

* *De Officiis*, 1, 5.

¹ Et utrarumque.

benivolis officium et diligens tribnitur cultus: gratia, in qua amicitarum et officiorum alterius memoria ¹ et remunerandi voluntas continetur: ² vindicatio, per quam vis et injuria, et omnino omne, quod obfuturum est, defendendo, aut ulciscendo propulsatur: ³ observantia, per quam homines aliqua dignitate antecedentes, cultu quodam et honore dignantur: ⁴ veritas, per quam immutata ea, quæ sunt, aut ante fuerunt, aut futura sunt, dicuntur.

LIV. Consuetudine jus est, quod aut leviter a natura tractum aluit et majus fecit usus, ut religionem; aut si quid eorum, quæ ante diximus, ab natura profectum, majus factum propter consuetudinem videmus; aut quod in morem vetustas vulgi approbatione perduxit: quod genus, pactum, par, judicatum. Pactum est, quod inter aliquos convenit: par, quod in omnes aquabile est: judicatum, de quo alicujus, aut aliquorum jam sententis constitutum est. Lege jus est, quod in eo scripto, quod populo expositum est, ut observet continetur. Fortitudo est considerata periculorum susceptio, et laborum perpessio. Ejus partes, magnificencia, fidentia, patientia, perseverantia. Mag-

¹ Et alterius remunerandi. ² Add. est. ³ Add. est.

⁴ Add. est.

nificantia est rerum magnarum, et excelsarum cum animi ampla quadam et splendida propositione agitatio atque administratio: fidentia est, per quam magnis et honestis in rebus multum ipse animus in se fiducia certa cum spe collocavit: patientia est honestatis, aut utilitatis causa, rerum arduarum ac difficultium voluntaria ac diurna persessio: perseverantia est in ratione bene considerata stabilis et perpetua permancio. Temperantia est rationis in libidinem, atque in alios non rectos impetus animi, firma et moderata dominatio. Ejus partes sunt, continentia, clementia, modestia*. Continentia est, per quam cupiditas, consilii gubernatione regitur: clementia, per quam animi, temere in odium alicujus¹ concitat, invectio comitate retinetur: modestia, per quam pudor honestus² caram et stabilem comparat auctoritatem. Atque haec omnia propter se solum, ut nihil adiungatur emolumenti, petenda sunt. Quod ut demonstretur, neque ad hoc nostrum institutum pertinet, et a brevitate praecipendi remotum est.

Propter se autem vitanda sunt, non ea modo, qua his contraria sunt, ut fortitudini ignavia, et justitiae injustitia, verum etiam illa, quæ propin-

* *De Offic. 1, 40.*

¹ Inventionis concitati, comitate retinentur. ² Claram.

qua videntur et finitima esse, absunt autem longissime: quod genus, fidentie contrarium est diffidentia, et ea re virtutem est; audacia non contrarium, sed appositorum est, ac propinquum, et tamen virtutem est. Sic unicunque virtuti finitimum virtutem reperiatur, aut certo jam nomine appellatum; ut audacia, quæ fidentia; pertinacia, quæ perseverantia finitima est; supersticio, quæ religione propinqua est: aut sine ullo certo nomine. Quæ omnia item, ut contra rerum bonarum, in rebus vitandis reponemus. Ac de eo quidem generis honestatis, quod omni ex parte propter se petitur, satis dictum est.

LV. Nunc de eo, in quo utilitas quoque adjungitur, quod tamen honestum vocamus, dicendum videtur. Sunt igitur multa, quæ nos quam dignitate, tum fructu quoque suo ducunt¹: quo in genere est gloria, dignitas, amplitudo, amicitia. Gloria est frequens de aliquo fama cum laude: dignitas, alicujus honesta, et cultu, et honore, et verecundia digna auctoritas: amplitudo, potentiae, aut majestatis, aut aliquarum copiarum magna abundantia: amicitia, voluntas erga aliquem rerum bonarum, illius ipsis causa, quem diligit, cum ejus pari voluntate. Hic, quia de civilibus causis loquimur, fruc-

¹ Add. ad se.

tus ad amicitiam adjungimus, ut eorum quoque causa petenda videatur: ne forte, qui nos de omni amicitia dicere ^x existimant, reprehendere incipiunt. Quanquam sunt, qui propter utilitatem modo petendam ² putent amicitiam; sunt qui propter se solum; sunt qui propter se, et utilitatem. Quorum quid verissime constituantur, alias locus erit considerandi. Nunc hoc sic ad usum oratoriorum relinquatur, utramque propter rem amicitiam esse expetendam. Amicitiarum autem ratio, quoniam partim sunt religionibus junctæ, partim non sunt, et quia partim veteres sunt, partim novæ, partim ab illorum, partim ab nostro beneficio profectæ, partim utiliores, partim minus utiles, ex causarum dignitatibus, ex temporum opportunitatibus, ex officiis, ex religionibus, ex vetustatibus habebitur.

LVI. Utilitas autem aut in corpore posita est, aut in extraneis rebus: quarum tamen rerum multo maxima pars ad corporis commodum revertitur, ut in republica quadam sunt, quæ, ut sic dicam, ad corpus pertinent civitatis, ut agri, portus, pecunia, classes, nautæ, milites, socii; quibus rebus inco^munitatem ac libertatem retinente civitates: alia vero, quæ jam quiddam magis amplum, et minus

^x Existimant. ² Putant.

necessarium conficiunt, ut urbis egregia exornatio atque amplitudo, ut quedam excellens pecuniae magnitudo, amicitiarum ac societatum multitudo. Quibus rebus non illud solum conficitur, ut salva^e et incolumes, verum etiam, ut amplæ atque potentes sint civitates. Quare utilitatis due partes videntur esse, incolumentas et potentia. Incolumentas est salutis tuta atque integra conservatio: potentia est ad sua conservanda, et alterius obtinenda, idonearum rerum facultas. Atque in iis omnibus quæ ante dicta sunt, quid difficuler fieri et quid facile fieri possit, oportet considerare. Facile fieri id dicimus, quod sine magno, aut sine ullo labore, sumtu, molestia, quam brevissimo tempore confici potest. Difficile autem fieri, quod quanquam laboris, sumtus, molestiæ, longinquitatis indiget, atque aut omnes, aut plurimas, aut maximas causas habet difficultatis, tamen, his susceptis difficultatibus, compleri atque ad exitum perduci potest.

Quoniam ergo de honestate et de utilitate diximus, nunc restat ut de iis rebus, quas his attributas esse dicebamus, necessitudine et affectione, perscribamus.

LVII. Puto igitur esse hanc necessitudinem, cui nulla vi resisti potest; quæ neque mutari, neque leniri potest. Atque, ut apertius hoc sit, exemplis

licet vim rei, qualis et quanta sit, cognoscamus.
 « Uri posse flamma ligneam materiam necesse est.
 « Corpus mortale aliquo tempore interire necesse
 « est; » atque ita necesse, ut vis postulat ea, quam
 modo describebamus, necessitudinis, cui nulla vi
 resisti potest, quæ neque mutari, neque leniri po-
 test. Hujusmodi [necessitudines] quum in dicendi
 rationes incident, recte necessitudines appellabun-
 tur: si aliqua res incident difficiles, in illa super-
 iori, possit fieri, quæstione considerabimus.
 Atque etiam hoc mihi videor videre, esse quasdam
 cum adjunctione necessitudines, quasdam sim-
 plices et absolutas. Nam aliter dicere solemus,
 « Necesse est Casilinenses se dedere Annibali; »
 aliter autem, « Necesse est Casilinum venire in
 « Annibalis potestatem. » Ilic, in superiori, ad-
 junctio est hæc, nisi si malunt fame perire; si
 enim id malunt, non necesse: hoc inferius non
 item, propterea quod, sive velint Casilinenses se
 dedere, sive famem perpeti atque ita perire, ne-
 cessesse est Casilinum venire in Annibalis potesta-
 tem*. Quid igitur perficere potest hæc necessitu-
 dinis distributio? Prope dicam, plurimum, quum
 is locus necessitudinis videbitur incurrere. Nam
 quum simplex erit necessitudo, nihil erit quod

* LIV. xxii, 15; xxiii, 17.

multa dicamus, quum eam nulla ratione lenire
 possimus: quum autem ita necesse erit, ut aliquid
 effugere, aut adipisci velimus, tum adjunctio illa
 quid habeat utilitatis, aut quid honestatis, erit
 considerandum. Nam si velis attendere (ita tamen,
 ut id quæras, quod conveniat ad usum civitatis),
 reperias nullam esse rem, quam facere necesse sit,
 nisi propter aliquam causam, quam adjunctionem
 nominamus; pariter autem esse multas res neces-
 situdinis, ad quas similis adjunctio non accedit.
 Quod genus, « Ut homines mortales intereant,
 « necesse est, » sine adjunctione; « Ut cibo utantur,
 « non necesse est, » nisi cum illa exceptione: Extra
 quam, si nolint fame perire. Ergo, ut dixi, illud,
 quod adjungitur, semper, cujusmodi sit, erit con-
 siderandum. Nam omni tempore id pertinebit, ut
 aut ad honestatem hoc modo exponenda necessi-
 tudo sit: « Necesse est, si honeste volumus vi-
 « vere; » aut ad incolumentum, hoc modo: « Ne-
 « cessere est, si incolumes volumus esse; » aut ad
 « commoditatem, hoc modo: « Necesse est, si sine
 « incommmodo volumus vivere. »

LVIII. Ac summa quidem necessitudo videtur
 esse honestatis; huic proxima, incolumentatis; tertia
 ac levissima, commoditatis: quæ cum his nunquam
 poterit duabus contendere. Hasce autem inter se
 saepe necesse est comparari, ut, quanquam præ-

stet honestas incolumitati, tamen, utri potissimum consulendum sit, deliberetur. Cujus rei certum quoddam præscriptum videtur in perpetuum dari posse. Nam, qua in re fieri poterit, ut, quum incolumitati consuluerimus, quod sit in præsentia de honestate delibatum, virtute aliquando et industria recuperetur, incolumitatis ratio videbitur habenda; quum autem id non poterit, honestatis. Ita in ejusmodi quoque re, quum incolumitati videbimus consulere, vere poterimus dicere, nos honestatis rationem habere, quoniam sine incolumitate eam nullo tempore possumus adipisci. Quia in re vel concedere alteri, vel ad conditionem alterius descendere, vel in præsentia quiescere, atque aliud tempus exspectare oportebit. In commoditatis vero ratione, modo illud attendatur, dignane causa videatur ea, quæ ad utilitatem pertinebit, quare aut de magnificentia, aut de honestate quiddam derogetur. Atque in hoc loco mihi caput illud videtur esse, ut quæramus, quid sit illud, quod si adipisci, aut effugere velimus, aliqua res nobis sit necessaria, hoc est, quæ sit adjunctio, ut proinde, uti quæque res erit, laboremus, et gravissimam quamque causam vehementissime necessariam judicemus.

Affectio est quædam ex tempore, aut ex negotiorum eventu aut administratione, aut hominum

studio, commutatio rerum, ut non tales, quales ante habitæ sint, aut plerumque haber soleant, habendæ videantur esse: ut, «Ad hostes transire turpe videtur esse; at non illo animo, quo «Ulysses transiit: et pecuniam in mare dejicere inutile; at non eo consilio, quo Aristippus ¹ de-«jecit.» Sunt igitur res quædam ex tempore, et ex consilio, non ex sua natura considerandæ: quibus in omnibus, quid tempora petant, aut quid personis dignum sit, considerandum est, et non quid, sed quo quidque animo, quicum, quo tempore, quādū fiat, attendendum est. His ex partibus, ad sententiam dicendam, locos sumi oportere arbitramur.

LIX. Laudes autem et vituperationes ex his locis sumentur, qui loci personis sunt attributi, de quibus ante dictum est. Sin distributius tractare quis volet, partiatur in animum, et corpus, et extrarias res licebit. Animi est virtus, cuius de partibus paullo ante dictum est; corporis, validudo, dignitas, vires, velocitas; extrariae, bonos, pecunia, affinitas, genus, amici, patria, potentia, et cetera, quæ simili esse in genere intelligentur. Atque in his, id, quod in omnia valet, valere oportebit: contraria quoque, quæ et qualia sint, intelligentur.

¹ Fecit.

394 DE INVENT. LIB. II.

Videre autem in laudando et vituperando oportebit, non tam qua in corpore, aut in extraneis rebus habuerit is, de quo agetur, quam quo pacto his rebus usus sit. Nam fortunam quidem et laudare, stultitia, et vituperare, superbia est; animi autem, et laus honesta, et vituperatio vehemens est.

Nunc quoniam omne in causæ genus argumentandi ratio tradita est, de Inventione, prima ac maxima parte rhetorica, satis dictum videtur. Quare, quoniam et una pars ad exitum ¹ hunc ab superiori libro perducta est, et hic liber non parum continet litterarum, quæ restant, in reliquis dicemus *.

¹ Hic Lambin. aliquid, ut putabat, emendatus voluit, hoc et superiori libro; quem jure Ernest. refellit.

* Dixisse vero nunquam, verisimillimum est. — Vid. LE CLERC, in Prolegomenis ad Herenn.

